

T 7903 / 1383 (11)

CHINESE-JAPANESE LIBRARY
HARVARD-YENCHING INSTITUTE
AT HARVARD UNIVERSITY

MAR 24 1958

共廿二、十一

四六

景岳全書

卷之九

雜證



Faint bleed-through text from the reverse side of the page, appearing as ghostly vertical columns of characters.

景岳全書卷二十五心集

雜證謨

會稽 張介賓 會卿著

會稽 魯 超 謙菴訂



心腹宜州

經義



舉痛論帝曰願聞人之五臟卒痛何氣使然岐伯對曰經脈流
行不止環周不休寒氣入經而稽遲泣而不行客於脈外則
血少客於脈中則氣不通故卒然而痛○帝曰其痛或卒然

而止者或痛甚不休者或痛甚不可按者或按之而痛止者
或按之無益者或喘動應手者或心與背相引而痛者或脇
肋與少腹相引而痛者或腹痛引陰股者或痛宿昔而成積
者或卒然痛死不知人少間復生者或痛而嘔者或腹痛而
後泄者或痛而閉不通者凡此諸痛各不同形別之奈何○
岐伯曰寒氣客於脉外則脉寒脉寒則縮絀縮絀則脉絀急
絀急則外引小絡故卒然而痛得炅則立止因重中於寒則
痛久矣○寒氣客於經脉之中與炅氣相薄則脉滿滿則痛
而不可按也寒氣稽留炅氣從上則脉克大而血氣亂故痛

甚不可按也○寒氣客於腸胃之間膜原之下血不得散小
絡急引故痛按之則血氣散故按之痛止○寒氣客於俠脊
之脉則深按之不能及故按之無益也○寒氣客於衝脉衝
脉起於關元隨腹直上寒氣客則脉不通脉不通則氣因之
故喘動應手矣○寒氣客於背俞之脉則脉泣脉泣則血虛
血虛則痛其俞注於心故相引而痛按之則熱氣至熱氣至
則痛止矣○寒氣客於厥陰之脉厥陰之脉者絡陰器繫於
肝寒氣客於脉中則血泣脉急故脇肋與少腹相引痛矣○
厥氣客於陰股寒氣上及少腹血泣在下相引故腹痛引陰

肢○寒氣客於小腸膜原之間絡血之中血泣不得注於大
經血氣稽留不得行故宿昔而成積矣○寒氣客於五臟厥
逆上泄陰氣竭陽氣未入故卒然痛死不知人氣復反則生
矣○寒氣客於腸胃厥逆上出故痛而嘔也○寒氣客於小
腸小腸不得成聚故後泄腹痛矣○熱氣留於小腸腸中痛
痺熱焦渴則堅乾不得出故痛而閉不通矣○帝曰所謂言
而可知者也視而可見奈何岐伯曰五臟六腑固盡有部視
其五色黃赤爲熱白爲寒青黑爲痛此所謂視而可見者也
○帝曰捫而可得奈何岐伯曰視其主病之脉堅而血反陷
下者皆可捫而得也

實按本篇論痛總計一十三條所言寒氣與炁氣相薄及熱
氣留於小腸閉而不通者止二條爲熱證而其他皆屬於寒
則此證之槩可知學者當思所辨矣

終始篇曰病痛者陰也痛而以手按之不得者陰也深刺之
痺論帝曰內含五臟六腑何氣使然岐伯曰五臟皆有合病久
而不去者內含於其合也○胞痺者少腹膀胱按之內痛若
沃以湯澁於小便上爲清涕○痛者寒氣多也有寒故痛也
骨空論曰眇絡季脇引少腹而痛脹刺諛諛

調經論曰實者外堅克滿不可按之按之則痛○虛者聶辟氣不足按之則氣足以溫之故快然而不痛

平人氣象論曰寸口脈沉而弱曰寒熱及疝瘕少腹痛○寸口脈沉而橫曰脇下有積腹中有橫積痛○脈急者曰疝瘕少

腹痛

邪氣臟腑病形篇曰心脈微急爲心痛引背食不下

衛氣篇曰新積痛可移者易已也積不痛難已也

厥病篇曰厥心痛與背相控善瘕如從後觸其心偃僂者腎心痛也○厥心痛腹脹胸滿心尤痛甚胃心痛也○厥心痛痛

如以錐鍼刺其心心痛甚者脾心痛也○厥心痛色蒼蒼如死狀終日不得太息肝心痛也○厥心痛卧若徒居心痛間動則痛益甚色不變肺心痛也○真心痛手足清至節心痛甚但發夕死夕發旦死○腸中有虫瘕及蛟蝮心腸痛懷作痛腫聚往來上下行痛有休止腹熱喜渴涎出者是蛟蝮也○以上皆有刺法詳在本經

雜病篇曰心痛引腰脊欲嘔取足少陰○心痛腹脹嗇嗇然大便不利取足太陰○心痛引背不得息刺足少陰不已取手少陽○心痛引小腹滿上下無常處便溲難刺足厥陰○心

痛但短氣不足以息刺手太陰○心痛當九節刺之按已刺
按之立已不已上下求之得之立已

六元正紀大論曰不遠熱則熱至不遠寒則寒至寒至則堅否
腹滿痛急下利之病生矣○土鬱之發甚則心痛脇腹嘔吐
霍亂飲發注下○金鬱之發心脇滿引小腹善暴痛不可反
側○水鬱之發民病寒客心痛○木鬱之發民病胃脘當心
而痛上支兩脇膈咽不通食飲不下○火鬱之發民病骨痛
腹中暴痛

邪氣臟腑病形篇曰大腸病者湯中切痛而鳴濯濯冬日重感
於寒卽泄當臍而痛不能久立與胃同候取巨虛上廉○胃
病者腹臙脹胃脘當心而痛上支兩脇膈咽不通食飲不下
取之三里也○小腸病者小腹痛腰脊控睪而痛時窘之後
取之巨虛下廉○膀胱病者小便偏腫而痛以手按之卽欲
小便而不得取委中央

五邪篇曰邪在肝則兩脇中痛寒中惡血在內行善製節時腳
腫○邪在脾胃則病肌肉痛陽氣不足陰氣有餘則寒中腸
鳴腹痛○邪在心則病心痛喜悲時眩仆○以上俱有刺法
在本經

經脉篇曰脾足太陰之脉入腹屬脾絡胃其支者復從胃別上膈注心中是動則病舌本強食則嘔胃脘痛腹脹善噫心下急痛得後與氣則快然如衰○心手少陰之脉起於心中出屬心系是動則病嗌乾心痛渴而欲飲○腎足少陰之脉其支者從肺出絡心是動則心如懸若饑狀舌乾咽腫煩心心痛○心主手厥陰之脉起於胸中出屬心包絡是動則胸脇支滿煩心心痛○膽足少陽之脉其直者從缺盆下腋循胸循脇裏是動則病口苦善太息心脇痛不能轉側

論證 共四條

凡病心腹痛者有上中下三焦之別上焦者痛在膈上此即胃脘痛也內經曰胃脘當心而痛者即此時人以此爲心痛不知心不可痛也若病真心痛者必手足冷至節爪甲青旦發夕死夕發旦死不可治也○中焦痛者在中脘脾胃間病也○下焦痛者在臍下肝腎大小腸膀胱病也○凡此三者皆有虛實寒熱之不同宜詳察而治之

一痛有虛實凡三焦痛證惟食滯寒滯氣滯者最多其有因虫因火因痰因血者皆能作痛大都暴痛者多有前三證漸痛者多由後四證但虫痛痰痛多在中焦火痛則三焦俱有之

血痛則多在下焦然惟婦人則常有血證而男子則少也諸
如此類但察其多滯多逆者方是實證如無滯逆則不得以
實論也辨之之法但當察其可按者爲虛拒按者爲實久痛
者多虛暴痛者多實得食稍可者爲虛脹滿畏食者爲實痛
徐而緩莫得其處者多虛痛劇而堅一定不移者爲實痛在
腸臟中有物有滯者多實痛在腔脇經絡不干中臟而牽連
腰背無脹無滯者多虛脉與證參虛實自辨微實者宜調不
宜攻大實者或上或下非攻不可純虛者或氣或血非大補
不可

一痛證有寒熱誤認之則爲害不小蓋三焦痛證因寒者常居
八九因熱者十惟一二觀內經舉痛等論義可知矣蓋寒則
凝滯凝滯則氣逆氣逆則痛脹由生而熱則流通多不然也
雖熱證亦常有痛然熱者必有明辨如內經所言腸中痛而
痺熱焦渴則堅乾不得出閉而不通者此因燥結熱閉故能
作痛然必有煩熱等證乃因於火最易見也今之醫家但見
心腹痛證無問有無寒熱便云諸痛皆屬於火多用寒涼不
知此說出自何典而彼此訛傳無墨無根妄亦甚矣又見丹
溪治法云凡心腹痛者必用溫散此是鬱結不行阻氣不運

故痛也。此說誠是也。然又引原病式云：若欲行溫散，寧無助火漆病也。由是古方多以山梔為主，加熱藥爲向導，或用二陳湯加川芎、蒼朮，倍加梔子煎服，痛甚者加炒乾薑反佐之。若此議論治法，余則大有不服。夫致病之由熱者，自熱寒者自寒，病因火邪清利自愈，固不必反佐也。病因寒滯，溫散自愈，又何爲反助火耶？蓋寒者熱之，熱者寒之，自此正治之正理，豈可不論經權不分從逆，旣宜梔子又宜乾薑，槩用反佐而治寒犯寒，治熱犯熱乎？因致後代醫流，凡有見不真者，每每借此爲成法，而藉口反佐，誤人於疑似之中者不少矣。故余特爲反佐論在前二卷中，以盡其義，宜均察也。

一痛證當辨有形無形。無形者痛在氣分，凡氣病而爲脹爲痛者，必或脹或止，而痛無常處，氣聚則痛而見形，氣散則平而無跡，此無形之痛也。但宜順氣，氣順則痛自愈矣。○有形者痛在血分，或爲食積，凡血瘀食積而爲脹痛者，必痛有常所，而脹無休息，不往不來，不離其處者，是有形之痛也。然或食或血，察得所因，乃可攻而去之，此二者之當辨也。

論痛脉

凡諸病之虛實，辨之於脉者，皆易。惟心腹痛證，則有大有小，其

脉多有難辨雖滑實有力者固多實邪虛弱無神者固多虛邪此其常也然暴痛之極者每多沉伏細澁最似極虛之候不知氣爲邪逆氣逆則脉道不行而沉伏異常此正邪實之脉然於沉伏之中細察之必有梗梗然弦緊之意此必寒邪阻遏陽氣者多有是脉若火邪作痛則不然也凡見此者不得因其細極微極便認爲虛脫妄用補劑必大誤矣辨此之法但當察其形氣以見平素之強弱問其病因以知新病久病及何所因而起大都暴病痛急而脉忽細伏者多實邪久病痛緩而脉本微弱者爲虛邪再以前論虛實之法酌之以理參而診之則萬無一失矣

論治 共十五條

凡心腹痛證必須先辨寒熱如無熱證熱脉則定非火邪不得妄用涼藥

凡治心腹痛證古云痛隨利減又曰通則不痛此以閉結堅實者爲言若腹無堅滿痛無結聚則此說不可用也其有因虛而作痛者則此說更如氷炭

凡痛在上焦者如因停滯既痛兼脹不易行散而痛極難忍者欲其滯去速效無如吐之之妙宜於新方吐法中擇而用

之若無停積脹急而或寒或氣微有凝滯而作痛者但順其氣無有不愈

一胃脘痛證多有因食因寒因氣不順者然因食因寒亦無不皆關於氣蓋食停則氣滯寒留則氣凝所以治痛之要但察其果屬實邪皆當以理氣爲主宜排氣飲加減主之食滯者兼乎消導寒滯者兼乎溫中若止因氣逆則但理其氣病自愈矣其有諸藥不效氣結難解者惟神香散爲妙○若氣有滯逆隨觸隨發者宜用後簡易二方最妙

一下焦小腹痛者或寒或熱或食或虫或血或氣逆皆有之凡閉結者利之下之當各求其類而治之

一寒滯之痛有因內寒者如食寒飲冷之類是也必兼寒兼食隨其宜而治之如上法可也○有因外寒者或觸冒不時之寒邪或犯客令之寒氣或受暴雨沙氣之陰毒以致心腹攪痛或吐或瀉或上不能吐下不能瀉而爲乾霍亂危劇等證總由寒氣犯臆或在上焦或在中下二焦凡痛急在上者用吐最妙在中在下者俱宜解寒行滯以排氣飲爲主加減治之或不換金正氣散或和胃飲平胃散十香丸之類皆可擇用其有寒逆之甚者宜四逆湯理中湯之類主之又神香散

可解三焦之滯當隨證作引以送之

一血積之有腹痛者是卽畜血證也而血證之屬有四○一傷寒有畜血證成無已曰邪氣聚於下焦則津液不得通血氣不得行或溺或血留滯於下是生脹滿而鞭痛也若從心下至少腹鞭滿而痛小便利者則是畜血之證此當分而治之其他證治詳義並見傷寒門○一婦人有血痛證詳見婦人門○一跌打損傷有瘀血腹痛證但去其瘀而痛自愈凡氣血和平者宜通瘀煎加減治之○其有血滯便結邪實不通者宜桃仁承氣湯百順丸主之或血虛燥結便閉不通者宜

玉燭散主之○一食鬱既久而胃脘有瘀血作痛者生韭飲一氣血虛寒不能營養心脾者最多心腹痛證然必以積勞積損及憂思不遂者乃有此病或心脾肝腎氣血本虛而偶犯勞傷或偶犯寒氣及飲食不調者亦有此證凡虛痛之候每多連綿不止而亦無急暴之勢或按之揉之溫之熨之痛必稍緩其在心脾胸脇之間者則或爲戚戚或爲怵怵或似饑非饑或饑勞更甚或得食稍可或懊懣無跡莫可名狀或形色青黃或脈微氣弱是皆虛寒之證此非甘溫養血補胃和中不可也宜大小營煎理陰煎之類加減主之若氣虛者必

大加人參陽衰者必佐以桂附乾薑丹溪曰諸痛不可補氣
此惟邪實氣滯者當避之而曰諸痛皆然則謬矣不可執以
爲辭也○一下虛腹痛必因虛挾寒或陽虛中寒者乃有之
察無形迹而喜按喜煖者是也治宜補陰逐寒必宜理陰煎
主之然男子則間或有之惟女人則因虛而痛者更多蓋女
人有月經帶濁之病所以爲異亦宜理陰煎大劑主之余用
此以活人多矣若虛中挾滯而血有不行者惟決津煎爲最
妙諸未盡者詳婦人門○凡治心腹痛證已經攻擊滌蕩愈
而復作或再三用之而愈作愈甚或脈反浮弦虛大者皆爲
中虛之候此當酌其虛實而或兼治邪氣或專補正氣若用
補無碍則當漸進切不可雜亂妄投以自製其肘但當純用
補藥使脾胃氣強得以運行則邪氣自不能犯又何疼痛之
有

一火邪熱鬱者皆有心腹痛證如火在上焦痛而兼脹者宜於
行氣導滯藥中倍加山梔黃芩之屬以治之若有痛無脹者
或宜加芍藥生地麥冬以佐之○若火在下焦者宜大分清
飲或茵陳飲之類主之○然火在上者必有煩熱焦渴喜冷
等證火在下者必有脹熱秘結淋澀等證務兼脈證察其真

有火邪方可治以寒涼如無火證火脉則不得妄稱為火以誤治也

一虫痛證治詳議虫門

一痰飲停滯胸膈亦能作痛凡胸脇膨悶漉漉有聲或作醋酸心嘔惡或痛連脇背者皆其證也宜清膈煎二陳湯橘皮半夏湯局方四七湯及括痰丸潤下丸之類並皆治之○又若東垣草豆蔻丸丹溪白螺丸亦皆治痰之劑○若鬱痰凝結消之不去者非用吐法不能除也

一陰寒腹痛者凡男婦有因房室之後中寒而痛極者此陰寒也宜先用葱薑搗爛炒熱或熱磚之屬熨其臍腹以解其寒極凝滯之氣然後用理陰煎或理中湯四逆湯之類加減治之其有痛極至危者須速灸神闕氣海等穴

一凡胸腹之痛有無關於內而在筋骨皮肉之間者此邪之在經不可混作裏證必須詳問的確但當分其或火或寒或氣或勞傷或血滯或血虛或有淫瘡邪毒留蓄在經辨其所因庶不致謬而治之亦易也

一大人小兒或素因口腹不節致傷脾胃以後或寒或食凡有所觸卽爲腹痛屢發不已或爲脹滿食減等證者惟芍藥枳

木丸爲最妙宜加減用之

一凡胸膈大痛連及脇背藥不能納到口卽吐者此則無論諸藥皆可發吐因就其勢探而吐之則最易最捷吐出邪滯積痰痛可立止若邪猶未盡痛猶未止則再以前藥與之務盡其邪無不愈者

述古 共二條

陳無擇云十二經絡外感六淫則其氣閉塞鬱於中焦氣與邪

爭發爲疼痛足厥陰心痛兩脇急引小腹連陰股相引痛手

心主痛徹背心煩掌中熱咽乾目黃赤脇滿足太陰心痛腹

脹滿漚漚然大便不利膈悶咽塞手太陰心痛短氣不足以

息季脇空痛遺失無度胸滿煩心足少陰心痛煩極面黑心

懸若饑胸滿腰脊痛背輪諸經心痛心與背相引心痛徹背

皆痛徹心諸腑心痛難以俛仰小腹上衝卒不知人嘔吐泄

瀉此皆諸經諸俞諸腑涉邪所致病屬外所因○若五臟內

動汨以七情則其氣痞結聚於中腕氣與血搏發爲疼痛肝

心痛者色蒼蒼如死狀終日不得太息真心痛者如前經義

脾心痛者如錐針刺其心腹蘊蘊然氣滿肺心痛者若從心

間起動作痛益甚色不變腎心痛者與背相控善瘳如物從

維光按此說不足引用

後觸其心身偃倭胃心痛者腹痛胸滿不下食食則不消皆
 臟氣不平喜怒憂鬱所致此屬內因○飲食勞逸觸忤非類
 使臟氣不平痞膈於中食飲滯注變亂腸胃發為疼痛或飲
 啖生冷果實中冷不能消散結而為積還食還發各積心痛
 及有臟寒生虺致心痛者所謂九種心痛曰飲曰食曰風曰
 冷曰熱曰悸曰虫曰注曰去來痛者除風熱寒屬外所因餘
 皆不內外因○更有婦人惡血入心脾經發作疼痛尤甚於
 諸痛更有卒中客忤鬼擊屍疰使人心痛亦屬不內外因
 丹溪曰心痛即胃脘痛雖日數多不喫食不死若痛方止便喫

物還痛必須三五服藥後方可漸漸喫物○痛甚者脉必代
 用溫藥附子之類不可用參朮○脉弦者是食宜溫散蓋食
 得寒則凝得熱則化更用行氣或利藥助之無不愈○脉滑
 者是痰痰因氣滯而聚阻碍道路氣不得通而痛宜導痰解
 鬱○凡痛必用溫散以其鬱結不行阻氣不運故也○腹痛
 以手可重按者屬虛宜參朮薑桂之類手不可按者是實宜
 用硝黃下之○肥白人腹痛多是氣虛兼濕痰宜半夏人參
 二朮之類○飲食過傷而腹痛宜木香檳榔丸下之如氣虛
 之人傷飲食而腹痛宜調補胃氣并消導藥參朮山查枳實

麥芽木香神麩之類。○如腹中常有熱而痛，此爲積熱，宜調胃承氣湯下之。○小腹實痛，用青皮以行其氣。小腹因寒而痛，宜桂枝吳茱萸。○臍下忽大痛，人中黑者多死。○心痛用山梔并劫藥止之。若又復發，前藥必不效，可用玄明粉一服立止。○脉堅實不大便者下之。

食停小腹新按

○凡腹痛因食者，或因滯物，或因冷物，皆能停積中脘，須用前治食法加減治之。此正法也。然又有食停小腹者，余嘗治一上舍年及三旬，因午刻食水煮麩角，將至初更食及小腹下至

右角間，遂停積不行，而堅突如拳，太如鷲卵，其痛之劇莫可名狀。余爲治之，察其明係麩積，顯而無疑。然計其已入大腸，此正通則不痛之證也。乃與木香檳榔丸連下二三次，其痛如故。因疑藥力之緩，猶未及病，乃更投神祐丸以瀉之，又不效。余謂此必藥性皆寒，故滯有不行也。因再投備急丸，雖連得大瀉，而兼痛毫不爲減。斯時也，余計窮矣。因潛測其由，不過因麩豈無所以制之。今既逐之不及，使非借氣以行之，不可也。且計麩毒非大蒜不殺，氣滯非木香不行，又其滯深道遠，非精銳之嚮導不能達。乃用火酒磨木香，令其嚼生蒜一

全書卷三十一
雜記
辨而以香酒送之一服後覺痛稍減三四服後痛漸止而食
漸進方得全愈然雖痛止食進而小腹之塊仍在後至半年
許始得消盡由是知欲消食滯卽大黃巴豆猶有所不能及
而推宜行氣爲先也且知飲食下行之道乃必由小腹下右
角間而後出於廣腸此自古無人言及者故并筆之用以廣
人之聞見

括沙新按

○向予荆人年及四旬於八月終初寒之時偶因暴雨後中陰寒
沙毒之氣忽於二鼓時上爲嘔惡下爲胸腹攪痛勢不可當

持值暮夜藥餌不及因以鹽湯探吐之痛不爲減遂連吐數
次其氣愈升則其痛愈劇因而上塞喉嗑甚至聲不能出水
藥毫不可入危在頃刻間矣余忽憶先年曾得秘傳括沙法
乃擇一光滑細口磁碗別用熱湯一鍾入香油一二匙卻將
碗口蘸油湯內令其煖而且滑乃兩手覆執其碗於病者背
心輕輕向下刮之以漸加重碗乾而寒則再浸再刮良久覺
胸中脹滯漸有下行之意稍見寬舒始能出聲頃之忽腹中
大嚮遂大瀉如傾其痛遂減幸而得活瀉後得睡一飯頃後
通身搔癢之極隨發出疙瘩風餅如錢大者不計其數至四

凡
鼓而退愈後細窮其義蓋以五臟之繫咸附於背故向下刮之則邪氣亦隨而降九毒氣上行則逆下行則順攻逆爲順所以得愈雖近有兩臂刮沙之法亦能治痛然毒深病急者非治背不可也至若風餅疔瘡之由正以寒毒之氣克塞表裏經臟俱閉故致危劇今其臟毒既解然後經氣得行而表裏俱散也可見寒邪外感之毒凡臟氣未調則表亦不解表邪未散則臟必不和此其表裏相關義自如此故治分緩急權衡在人矣繼後數日一魏姓者亦於二鼓忽患此證治不得法竟至五鼓痛極而斃遇與不遇此其所以爲命也

附按

徐東臯云匡掌科夫人年三十餘病胃院連胸脇痛日輕夜甚兩寸關脈弦滑有力諸醫以積滯凝寒用發散及攻下藥繼用鐵刷散四磨飲等方俱不效後用湯水皆吐而不納經月不食痛且益甚予謂其爲痰鬱明矣但痛久弱甚不敢行吐法奈何偶一醫謂五靈脂沒藥素用有效衆皆哂之曰此藥用之多矣予謂再用亦無妨何哂之有彼用酒調病者到口便吐隨吐綠痰兩碗許痛卽止遂納飲食此蓋痰在膈上攻下之亦不去必得吐法而後愈經曰有痧無殞此之謂歟

簡易方

一胃脘當心而痛，或氣或寒，觸而屢發者，用荔枝核燒微焦，每荔枝核一錢，加木香七分，共爲末，以清湯下一錢許，數服可
以除根，屢試神效者。

一胸膈胃脘大痛，察有邪滯，連用排氣飲，及諸藥全不見效者，
但用牙皂角，以微火燒烟，甫盡，卽取起爲末，用燒酒調送七
八分，或一錢許，其效如神，亦余試效者。

兵部手集方 治久心痛十年五年者，隨手效，用小蒜以嚴醋
煮熟頓服，此後再不發。

治脾痛三方歌

腹脹脾疼怎抵當，椒薑之外有丁香，三般等分羅爲末，調入
白鹽與白湯。

水磨烏藥治脾疼，每服須教一盞濃，一片陳皮一蘘葉，再煎
濃服有神功。

心與脾疼有妙方，良薑切碎等棋榔，兩般同炒研爲末，米飲
同調服亦良。

食療方 治五臟冷痛心腹痛，以胡椒二十一粒搗碎，熱酒服
之。

肝後方 治心腹俱脹痛短氣欲死或已絕者用官桂三兩切
碎以水一升二合煮入合去渣頓服無桂用薑亦可

腹痛灸法

內關

中腕

氣海

神關填椒鹽灸之

水分

膈俞

臍俞

胃俞

心腹痛論列方

吐法 新攻一

備急丸 攻五二

分清飲 新寒五

四逆湯 熱十四

氣飲 新和六

局方四七湯 和九七

大營煎 新補十四

小營煎 新補十五

木香枳榔丸 攻四九

通瘀煎 新因五

神香散 新和二十

桃仁承氣湯 攻四

潤下丸 和百十七

二陳湯 和一

調胃承氣湯 攻三

清膈煎 新寒九

茵陳飲 新寒八

括痰丸 新和十九

橘皮半夏湯 和十三

玉燭散 攻二四

十香丸 新和十五

芍藥枳木丸 新和十六

平胃散 和十七

生韭飲 和一五一

白螺丸 和百十五

東垣草豆蔻丸 和一六七

和胃飲 新和五

理陰煎 新熱三

神祐丸 攻四八

不換金正氣散 和二一

決津煎 新因二

百順丸 新攻六

理中湯 熱一

論外備用方

荔枝散 新因二八

赤金豆 新攻二

木香順氣散 和四三

歸脾湯 補三三

遊山散 和七六

調氣平胃散 和十八

參附湯 補三八

神祐丸 以五三

附子茴香散 熱一四九

人參散 和一六二

牙皂散 新因二七

藿香安胃散 熱七二

四磨飲 和五二

強中湯 熱九二

茱萸四逆湯 熱十八

蘇合丸 和三七一

鐵刷散 熱百十

八味建中湯 補二五

烏藥散 和七四

益黃散 和十九

指迷七氣湯 和五一

平拈散 和七五

七氣湯 和四七

木香調氣散 和四四

八味湯 熱一四二 虛寒氣滯

調痛散 和七二 氣逆

丁香止痛散 和七三 心痛甚

蟠葱散 熱百十一 寒滯

祛痛散 和七一 心氣滯

胡椒理中湯 熱六 肺胃虛寒

胃參散 熱七一 虛寒

玄桂丸 和七八 瘀血痛

厚朴溫中湯 熱九一 逐寒滯

勝金散 熱百九 氣逆

舒筋散 和七七 跌閃腹痛

丁香茯苓湯 熱六四 溫行滯

大沉香丸 熱百十四 冷氣

沉香桂附丸 熱百十二 寒氣

附子理中湯 熱三 虛寒

吳茱萸散 熱百四十 寒濕

木香瀉氣丸 因二七六 小腹氣痛

金匱大建中湯 補二二三 寒痛

大已寒丸 熱一七一 寒病

小建中湯 補二二 補

事後中寒腹痛 因二七八

椒附丸 熱百十三 小腹痛

溫胃湯 熱十三 寒傷脾

冷香湯 熱八二 生冷

脇痛

經義

臟氣法時論曰肝病者兩脇下痛引少腹令人善怒○心病者

胸中痛脇支滿脇下痛

太奇論曰肝雍兩胛滿卧則驚不得小便

邪客篇曰肝有邪其氣流於兩脇

熱論篇曰傷寒三日少陽受之少陽主膽其脈循脇絡於耳故胸脇痛而耳聾

刺熱篇曰肝熱病者熱爭則狂言及驚脇滿痛手足躁不得安

卧刺足厥陰少陽○熱病先胸脇痛手足躁刺足少陽補足太陰

舉痛論曰寒氣客於厥陰之脈則血泣脈急故脇肋與少腹相引痛矣

玉機真臟論曰風寒客於人弗治則病入舍肺弗治肺即傳而

行之肝名曰肝痺脇痛出食○春脈不及則令人胸痛引背下則兩脇脹滿

五臟生成篇曰青脈之至也長而左右彈有積氣在心下支胫名曰肝痺

脈要精微論曰肝脈搏堅而長色不青當病墜若搏因血在脇下令入喘逆

五邪篇曰邪在肝則兩脇中痛寒中惡血在內行善掣節時腳腫取之行間以引脇下補三里以溫胃中取血脈以散惡血取耳間青脈以去其掣

欬論曰肝欬之狀欬則兩脇下痛甚則不可以轉轉則兩胠下滿

繆刺論曰邪客於足少陰之絡令人卒心痛暴脹胸脇支滿無積者刺然骨之前出血如食頃而已○邪客於足少陽之絡令人脇痛不得息欬而汗出刺足小指次指爪甲上與肉交者各一瘡○邪客於足太陽之絡令人拘攣背急引脇而痛刺之從項如數脊椎俠脊疾按之應手如痛刺之傍三瘡立已

骨空論曰少絡季脇引小腹而痛脹刺諶諶

邪氣臟腑病形篇曰肝脈微急爲肥氣在脇下若覆杯○胃病者腹臙脹胃脘當心而痛上支兩脇膈咽不通食飲不下取之三里也

奇病論曰病脇下滿氣逆二三歲不已病名曰息積此不妨於食不可灸刺積爲導引服藥藥不能獨治也

四時刺逆從論曰少陽有餘病筋痺脇滿

厥論曰少陽之厥暴聾頰腫而熱脇痛肝不可以運

腹中論曰有病胸脇支滿者妨於食病至則先聞腥臊臭出清液先唾血四支清目眩時時前後血病名曰血枯此得之年

少時有所大脫血若醉入房中氣竭肝傷故月事衰少不來也治以烏賊魚骨丸

脉解篇曰少陽所謂心脇痛者言少陽盛也盛者心之所表也九月陽氣盡而陰氣盛故心脇痛也

五臟生成篇曰腹滿臘脹支膈胘脇下厥上胃過在足太陰陽明

經脉篇曰心所生病者目黃脇痛○心主手厥陰心包絡也是動則病手心熱甚則胸脇支滿心中憺憺大動○膽足少陽也是動則病口苦善大息心脇痛不能轉側

本臟篇曰肝小則臟安無脇下之病肝大則逼胃迫咽迫咽則苦隔中且脇下痛肝高則上支貢切脇悞爲息貢肝下則逼胃脇下空脇下空則易受邪肝堅則臟安難傷肝脆則善病消瘴易傷肝端正則和利難傷肝偏傾則脇下痛也○脾小則臟安脾大則苦湊肋而痛不能疾行脾高則眇引季脇而痛○胸脇好者肝堅脇骨弱者肝脆脇骨偏舉者肝偏傾也標本病傳論曰夫病傳者心病先心痛一日而欬三日脇支痛五日閉塞不通身痛體重三日不已死○肺病喘欬三日而脇支滿痛一日身重體痛五日而脹十日不已死○肝病頭

目眩脇支滿三日體重身痛五日而脹三日腰脊少腹痛脛
痠三日不已死○腎病少腹腰脊痛脰痠三日背脇筋痛小
便閉三日腹脹三日兩脇支痛三日不已死○諸病以次是
相傳如是者皆有死期不可刺

氣交變大論曰歲木太過風氣流行民病反脇痛而吐甚○歲
火太過炎暑流行甚則胸中痛脇支滿脇痛○歲金太過燥
氣流行肝木受邪民病兩脇下少腹痛脘脇不可轉側○歲
木不及燥乃大行民病中清脘脇痛○歲火不及寒乃大行
民病胸中痛脇支滿兩脇痛○歲土不及復則收政嚴峻各

木蒼凋胸脇暴痛下引少腹○木不及其青東其臟肝其病
內舍脘脇外在關節○火不及其青南其臟心其病內舍膺
脇外在經絡○金不及其青西其臟肺其病內舍膺脇肩背
外在皮毛

六元正絕大論曰厥陰所至爲脇痛嘔泄○金鬱之發民病欬
逆心脇滿引少腹善暴痛不可反側○木鬱之發民病胃脘
當心而痛上支兩脇

至真要大論曰歲厥陰在泉風淫所勝民病心痛支滿兩脇裏
急飲食不下○歲陽明在泉燥淫所勝民病心脇痛不能反

側○厥陰司天民病胃脘當心而痛上支兩脇膈咽不通飲食不下○少陰司天熱淫所勝民病胸中煩熱右胠滿○陽明司天民病左胠脇痛心脇暴痛不可反側○厥陰之勝胃脘當心而痛上支兩脇○太陰之勝病在胠脇○陽明之勝清發於中左胠脇痛○陽明之復清氣大來病生胠脇氣歸於左

論證 共三條

脇痛之病本屬肝膽二經以二經之脉皆循脇肋故也然而心肺脾腎與膀胱亦皆有脇痛之病此非諸經皆有此證但

以邪在諸經氣逆不解必以次相傳延及少陽厥陰乃致脇肋疼痛故凡以焦勞憂慮而致脇痛者此心肺之所傳也以飲食勞倦而致脇痛者此脾胃之所傳也以色慾內傷水道壅閉而致脇痛者此腎與膀胱之所傳也傳至本經則無非肝胆之病矣至於忿怒疲勞傷血傷氣傷筋或寒邪在半表半裏之間此自本經之病病在本經者直取本經傳自他經者必拔其所病之本辨得其真自無不愈矣

一脇痛有內傷外感之辨凡寒邪在少陽經乃病爲脇痛耳聾而嘔然必有寒熱表證者方是外感如無表證悉屬內傷但

內傷脇痛者十居八九外感脇痛則間有之耳

一脇痛有左右血氣之辨其在諸家之說有謂肝位於左而藏血肺位於右而藏氣故病在左者爲血積病在右者爲氣鬱脾氣亦係於右故濕痰流注者亦在右若執此說則左豈無氣右豈無血食積痰飲豈必無涉於左乎古無是說此實後世之謬談不足憑也然則在氣在血何以辨之但察其有形無形可知之矣蓋血積有形而不移或堅硬而拒按氣痛流行而無迹或倏聚而倏散若食積痰飲皆屬有形之證第詳察所因自可辨識且凡屬有形之證亦無非由氣之滯但得氣行則何聚不散是以凡治此者無論是血是痰必皆兼氣爲主而後隨宜佐使以治之庶得肯綮之法無不善矣

論治 共三條

一外感證邪在少陽身發寒熱而脇痛不止者宜小柴胡湯三柴胡飲或河間葛根湯之類酌宜用之○若外邪未解而兼氣逆脇痛者宜柴胡疎肝散主之若元氣本虛陰寒外閉邪不能解而脇痛畏寒者非大溫中飲不可

一內傷肝胆氣逆不順而脇痛者宜排氣飲推氣散沉香降氣散木香調氣散之類主之○若鬱結傷肝中脘不快痛連兩

脇或多痰者宜香橘湯○若暴怒傷肝氣逆脹滿胸脇疼痛者宜解肝煎○若怒氣傷肝因而動火脇痛脹滿煩熱或動血者宜化肝煎○若氣滯胸脇痛而兼喘者宜分氣紫蘓飲○若男子憂鬱傷肝兩脇疼痛者宜枳實散○若男婦肝腎氣滯自下而上痛連兩脇者宜木通散○若悲哀煩惱肝氣受傷脈緊脇痛者枳殼煮散○若因驚氣逆脇痛不已者桂枝散○若食積作痛但痛有一條扛起者是也大和中飲或用保和丸○若痰飲停伏胸脇疼痛者導痰湯加白芥子○若肝火內鬱二便不利兩脇痛甚者當歸龍薈丸或左金丸

○若從高跌墜血流脇下作痛者復元活血湯○若婦人血滯脇腹連痛者芍藥散決津煎○若肝脾血虛或鬱怒傷肝寒熱脇痛者逍遙散○若肝腎虧損脇肋作痛頭眩心跳身痛或婦人經水不調經後作痛者補肝散

一內傷虛損脇肋疼痛者凡房勞過度腎虛羸弱之人多有胸脇間隱隱作痛此肝腎精虛不能化氣氣虛不能生血而然凡人之氣血猶源泉也盛則流暢少則壅滯故氣血不虛則不滯虛則無有不治者倘於此證不知培氣血而但知行滯通經則愈行愈虛鮮不殆矣惟宜左歸飲小營煎及大補元

全書卷二十五
灸法
灸之類主之。或有微滯者用補肝散亦可。○若憂思過度耗傷心脾氣血病有如前者宜逍遙飲三陰煎七福飲之類主之。或歸脾湯亦可。○若以勞倦過傷肝脾氣血而病如前者宜大營煎大補元煎之類主之。

治卒脇痛不可忍者用蠟繩橫度兩乳中半屈繩從乳斜趨痛脇下繩盡處灸三十壯更灸章門七壯丘墟三壯可鍼人五分

脇痛論列方

三陰煎 新補十一
七福飲 新補七

小柴胡湯 散十九
逍遙散 補九三

歸脾湯 補三三
三柴胡飲 新散三

逍遙飲 新因一
推氣散 和三七七

大溫中飲 新散八
枳實散 和三七六

導痰湯 和九一
柴胡疎肝散 散百十

香橘湯 和三七四
解肝煎 新和十一

當歸龍薈丸 寒一六七
桂枝散 散百十一

化肝煎 新寒十
復元活血湯 外二首
四十一

小營煎 新補十五
決津煎 新因二

左歸飲 新補二

大營煎 新補十四

補肝散 婦九二

排氣飲 新和六

大補元煎 新補一

左金丸 寒一五四

分氣紫蘇飲 和三七五

枳殼煮散 散百九

河間葛根湯 散百十二

芍藥散 婦百三十

沉香降氣散 和四十四

木通散 攻百十一

木香調氣散 和四十四

大和中飲 新和七

保和丸 小三五

論外備用方

柴胡清肝散 寒五九
肝火

桃仁承氣湯 攻四
瘀血

神保丸 攻五三
寒氣食積

控涎丹 攻八二
痰

加味小柴胡湯 散二二
傷寒

梔子清肝散 寒六十
風熱

神芎丸 攻七三
風痰

大黃附子湯 攻百十二
寒積

白朮丸 和三七八
息積

木香順氣散 和四三
肝氣

腰痛

經義

脉要精微論曰。腰者腎之府。轉搖不能。腎將憊矣。○腎脉搏堅

而長其色黃而赤者當病折腰

邪氣臟腑病形篇曰腎脉緩甚為折脊

五癘津液別篇曰五穀之精液和合而為膏者內滲入於骨空

補益腦髓而下流於陰股陰陽不和則使液溢而下流於陰

髓液皆減而下下過度則虛虛故腰背痛而脛痠

本神篇曰腎盛怒而不止則傷志志傷則喜忘其前言腰脊不

可以俛仰屈伸

經脉篇曰足少陰之別名曰大鍾當踝後繞跟別走太陽實則

閉癢虛則腰痛取之所別也○膀胱足太陽也是動則病衝

頭痛目眇脫項如拔脊痛腰似折○肝足厥陰也是動則病

腰痛不可以俛仰

脉解篇曰太陽所謂腫腰脰痛者正月太陽寅寅太陽也正月

陽氣出在上而陰氣盛陽未得自次也故腫腰脰痛也○少

陰所謂腰痛者少陰者腎也十月萬物陽氣皆傷故腰痛也

○厥陰所謂腰脊痛不可以俛仰者三月一振榮華萬物一

俛而不仰也

骨空論曰督脉為病脊強反折○腰痛不可以轉搖急引陰邪

刺入髖與痛上入髖在腰尻分間

刺腰痛篇曰足太陽脉令人腰痛○以下共十七證各有刺法
具詳本篇

雜病篇曰腰痛痛上寒取足太陽陽明痛上熱取足厥陰不可
以俛仰取足少陽

終始篇曰刺諸痛者其脉皆實故曰從腰以上者手太陰陽明
皆主之從腰以下者足太陰陽明皆主之○病在上者下取
之病在下者高取之病在頭者取之足病在腰者取之脘○
病痛者陰也痛而以手按之不得者陰也深刺之病在上者
陽也病在下者陰也審者陽也淺刺之

熱論篇曰傷寒一日巨陽受之故頭項痛腰脊強

刺瘧論曰足太陽之瘧令人腰痛○足厥陰之瘧令人腰痛○

腎瘧者令人洒洒然腰脊痛○先腰脊痛者先刺郄中出血

論證 共三條

腰痛證舊有五辨一曰陽虛不足少陰腎衰二曰風痺風寒濕

著腰痛三曰勞役傷腎四曰墜墮損傷五曰寢臥濕地雖其

大約如此然而猶未悉也蓋此證有表裏虛實寒熱之異知

斯六者庶乎盡矣而治之亦無難也

一腰痛證凡悠悠戚戚屢發不已者腎之虛也○遇陰雨或久

坐痛而重者濕也。○遇諸寒而痛，或喜煖而惡寒者，寒也。○遇諸熱而痛，及喜寒而惡熱者，熱也。○鬱怒而痛者，氣之滯也。○憂愁思慮而痛者，氣之虛也。○勞動即痛者，肝腎之衰也。當辨其所因而治之。

一腰爲腎之府，腎與膀胱爲表裏，故在經則屬太陽，在臟則屬腎氣，而又爲衝任督帶之要會，所以凡病腰痛者，多由真陰之不足，最宜以培補腎氣爲主，其有實邪而爲腰痛者，亦不過十中之二三耳。

論治 共之條

一腰痛之虛證，十居八九，但察其既無表邪，又無濕熱，而或以年衰，或以勞苦，或以酒色斷喪，或七情憂鬱所致者，則悉屬真陰虛證。凡虛證之候，形色必清白，而或見黎黑，脉息必和緩，而或見細微，或以行立不支，而臥息少可，或以疲倦無力，而勞動益甚，凡積而漸至者，皆不足，暴而痛甚者，多有餘，內傷稟賦者，皆不足，外感邪實者，多有餘，故治者當辨其所因。○凡腎水真陰虧損，精血衰少而痛者，宜當歸地黃飲，及左歸丸，右歸丸爲最。○若病稍輕，或痛不甚，虛不甚者，如青娥丸，煨腎散，補髓丹，二至丸，通氣散之類，俱可擇用。

一腰痛之表證凡風寒濕滯之邪傷於太陽少陰之經者皆是也○若風寒在經其證必有寒熱其脉必見緊數其來必驟其痛必拘急兼痠而多連脊背此當辨其陰陽治從解散凡陽證多熱者宜一柴胡飲或正柴胡飲之類主之若陰證多寒者宜二柴胡飲五積散之類主之其有木盡當於傷寒門辨治

一濕滯在經而腰痛者或以雨水或以濕衣或以坐卧濕地凡濕氣自外而入者總皆表證之屬宜不換金正氣散平胃散之類主之○若濕而兼虛者宜獨活寄生湯主之○若濕滯腰痛而小水不利者宜胃苓湯或五苓散加蒼朮主之○若風濕相兼一身盡痛者宜羌活勝濕湯主之○若濕而兼熱者宜當歸拈痛湯蒼朮湯之類主之○若濕而兼寒者宜濟生朮附湯五積散之類主之

一腰痛有寒熱證寒證有二熱證亦有二○凡外感之寒治宜溫散如前或用熱物熨之亦可○若內傷陽虛之寒治宜溫補如前○熱有二證若肝腎陰虛水虧火盛者治當滋陰降火宜滋陰八味煎或用四物湯加黃柏知母黃芩梔子之屬主之○若邪火蓄結腰腎而本無虛損者必痛極必煩熱或

大渴引飲或二便熱澁不通當直攻其火宜大分清飲加減
主之

一跌撲傷而腰痛者此傷在筋骨而血脉凝滯也宜四物湯加
桃仁紅花牛膝肉桂玄胡乳香沒藥之類主之○若血逆之
甚而大便閉結不通者宜元戎四物湯主之或外以酒糟葱
薑搗爛罨之其效尤速

一丹溪云諸腰痛不可用參補氣補氣則疼愈甚亦不可峻用
寒涼得寒則閉遏而痛甚此言皆未嘗也蓋凡勞傷虛損而
陽不足者多有氣虛之證何爲參不可用又如火聚下焦痛

極而不可忍者速宜清火何爲寒涼不可用但虛中挾實不
宜用參者有之雖有火而熱不甚不宜過用寒涼者亦有之
若謂槩不可用豈其然乎○余嘗治一董翁者年逾六旬資
稟素壯因好飲火酒以致濕熱聚於太陽忽病腰痛不可忍
至求自盡其甚可知余爲診之則六脉洪滑之甚且小水不
通而膀胱脹急遂以大分清飲倍加黃柏龍胆草一劑而小
水頓通小水通而腰痛如失若用丹溪之言鮮不誤矣是以
不可執也新按

一婦人以胎氣經水損陰爲甚故尤多腰痛腳痠之病宜當歸

地黄飲主之

述古

陳無擇曰腎著之候其體重腰冷如水食飲如故小便自利腰已下冷重如帶五千錢治宜流濕兼用溫散藥腎著湯主之○又滲溫湯亦治腎著

丹溪治法曰腎虛腰痛用杜仲龜板黃柏知母枸杞五味之類猪脊髓丸服○瘀血用補陰丸加桃仁紅花○濕熱蒼朮杜仲黃柏川芎之類○痰積作痛二陳加南星加快氣藥佐之使痰隨氣運○腰曲不能伸○鍼人中立愈

徐東臯曰腰者腎之外候一身所持以轉移闔闢者也蓋諸脉皆貫於腎而絡於腰脊腎氣一虛腰必痛矣除墜傷之外不涉於虛其於風寒濕熱雖有外邪多有乘虛相犯而驅邪之中又當有以究其本也舉世之人每每醉以入房欲竭其精耗散其真務快其心恬不知養其不虛者幾希予見房室勞傷腎氣腰脊兼痛久則髓減骨枯發爲骨痿者有矣豈直腰痛已哉養生君子不可以不慎於斯也甫年少時常有腰痛及閃挫之病每服補腎湯丸僅得不甚而易愈尚不知房室之害也予稟性淡於慾事自壬子以來多遊江湖間欲漸稀

而腰痛亦稀至辛酉之後集此書兼視病家無暇而欲益寡
腰覺強健而絕無痛作之因可見寡欲之功優於補劑多矣
併書於此為君子告焉

簡易方

太平聖惠方 治風冷寒痺腰痛

用川烏頭三個生搗為末少加鹽水調攤於紙帛上貼痛處
須臾止

又方 治卒患腰脚疼痛

用杜仲一兩製水二鍾煎一鍾再用羊腎四枚細切去脂膜

入藥湯煮熟次入韭白鹽花椒薑醬醋作羹空腹食之二三
次即腰脚倍健

鍼灸法

灸腰痛不可俛仰令患人正立以竹杖柱地平臍點記乃以度
背於脊中點記隨年壯灸之

腎俞 三壯或七壯

崑崙 三壯

委中 刺出血治脚腰腫痛

腰痛論列方

青娥丸 補一四五

煨腎散 和二八二

大分清飲 新寒五

四物湯 補八

補髓丹 補一四五

當歸地黃飲 新補二十

補陰丸 寒百六十

二至丸 熱一二九

當歸拈痛湯 寒百三十

左歸丸 新補四

右歸丸 新補五

元戎四物湯 攻二六

二陳湯 和一

五積散 散三九

滋陰八味煎 新寒十七

平胃散 和十七

胃苓湯 六百九十

濟生木附湯 補四三

五苓散 和一八二

腎著湯 熱百三十

羌活勝濕湯 和一七八

滲濕湯 和一七四

一柴胡飲 新散一

獨活寄生湯 和二百七十

蒼朮湯 寒一三三

二柴胡飲 新散二

不換金正氣散 和二二

通氣散 婦一三一

正柴胡飲 新散六

論外備用方

麋茸丸 補一三六

加味青娥丸 補一四六

滋陰大補丸 補一二七

舒筋湯 和七七

胡桃湯 和二八四

調營活絡飲 和二八二

生附湯 熱二四

芍藥散 婦一三一

沉香桂附丸 熱百十二 陽虛

景岳全書卷之二十六必集 雜證謨

會稽 張介賓 會卿著

會稽 魯 趙 謙菴訂

頭痛

經義

五藏生成篇曰頭痛顛疾下虛上實過在足少陰巨陽甚則入腎○心煩頭痛病在膈中過在手巨陽少陰

經脉篇曰膀胱足太陽也是動則病衝頭痛目似脫項如拔

脉解篇曰陽明並於上上者則其孫絡太陰也故頭痛鼻鼽腹腫也

通評虛實論曰頭痛耳鳴九竅不利腸胃之所生也

著至教論曰三陽獨至者是三陽並至並至如風雨上爲巔疾下爲漏病

脉要精微論曰來疾去徐上實下虛爲厥巔疾○推而下之不下而不上頭項也

人氣象論曰寸口之脉中手短者曰頭痛

要精微論曰厥成爲巔疾○顛痛刺手陽明與顛之盛脉出

血○顛痛刺足陽明曲周動脉見血立已不已按人迎於經立已○項痛不可俛仰刺足太陽不可以顧刺手太陽也

寒熱病篇曰陽迎頭痛胸滿不得息取之人迎○足太陽有通項入於腦者正屬日本名曰眼系頭目苦痛取之在項中兩筋間

雜病篇曰厥挾脊而痛者至頂頭沈沈然目眈眈然腰脊強取足太陽膈中血絡

奇病論帝曰人有病頭痛以數歲不已此安得之名爲何病岐伯曰當有所犯內至骨髓髓者以腦爲主腦逆故令頭痛齒

亦痛病名曰厥逆帝曰善

厥病篇曰真頭痛頭痛甚腦盡痛手足寒至節死不治

論證 共二條

凡診頭痛者當先審久暫次辨表裏蓋暫痛者必因邪氣久病者必兼元氣以暫病言之則有表邪者此風寒外襲於經也治宜疎散最忌清降有裏邪者此三陽之火熾於內也治宜清降最忌升散此治邪之法也其有久病者則或發或愈或以表虛者微感則發或以陽勝者微熱則發或以水虧於下而虛火乘之則發或以陽虛於上而陰寒勝之則發所以暫

病者當重邪氣久病者當重元氣此固其大綱也然亦有暫病而虛者久病而實者又當因脈因證而詳辨之不可執也一頭痛有各經之辨凡外感頭痛當察三陽厥陰蓋三陽之脈俱上頭厥陰之脈亦會於巔故仲景傷寒論則惟三陽有頭痛厥陰亦有頭痛而太陰少陰則無之其於辨之之法則頭腦額顱雖三陽俱有所會無不可痛然太陽在後陽明在前少陽在側此又各有所主亦外感之所當辨也○至若內傷頭痛則不得以三陽爲拘矣如本經所言下虛上實過在足少陰巨陽若厥病篇所論則足六經及手少陰少陽皆有之

矣奇病論曰腦者陰也隨者骨之克也凡痛在腦者豈非少陰之病乎此內證外證之異所不可不察也

厥病篇義 詳類經

論治 共五條

一外感頭痛自有表證可察蓋其身必寒熱脈必緊數或身清涕或兼咳嗽或兼脊背痠痛或兼項強不可以左右顧是皆寒邪在經而然散去寒邪其痛自止如用芎細辛蔓荊子柴胡之類皆最宜也若寒之甚者宜用麻黃桂枝生薑蔥白紫菀白芷之類隨其虛實而加減用之

一火邪頭痛者雖各經皆有火證而獨惟陽明為最正以陽明胃火盛於頭面而直達頭維故其痛必甚其脈必洪其證必多內熱其或頭腦振振痛而兼脹而絕無表邪者必火邪也欲治陽明之火無如白虎湯加澤瀉木通生地麥冬之類以抑其至高之勢其效最速至若他經之火則芍藥天花苓連知栢龍膽梔子之類無不可擇而用之但治火之法不宜佐以升散蓋外邪之火可散而去內鬱之火得升而愈熾矣此為忌也

一陰虛頭痛即血虛之屬也凡久病者多有之其證多因水虧所以虛火易動火動則痛必兼煩熱內熱等證治宜壯水為

全書卷二十六
雜證論
主當用滋陰八味煎加減一陰煎玉女煎之類主之○火微者宜六味地黃丸四物湯三陰煎左歸飲之類主之

一陽虛頭痛卽氣虛之屬也亦久病者有之其證必戚戚悠悠或羞明或畏寒或倦怠或食飲不甘脉必微細頭必沉沉遇陰則痛逢寒亦痛是皆陽虛陰勝而然治宜扶陽爲主如理陰煎理中湯十全大補湯補中益氣湯之類皆可擇用或以五福飲五君子煎加川芎細辛蔓荊子之類以升達陽氣則最善之治也

痰厥頭痛諸古方書皆有此名目然以余論之則必別有所因但以頭痛而兼痰者有之未必因痰頭痛也故兼痰者必見嘔惡胸滿脇脹或欬嗽氣粗多痰此則不得不兼痰治之宜二陳湯六安煎和胃飲平胃散加川芎細辛蔓荊子之類主之○如多痰兼火者宜用清膈煎或二陳湯六安煎加黃芩天花粉之類主之火甚者加石膏亦可○如多痰兼虛而頭痛者宜金水六君煎或六君子湯加芎辛之類酌而用之○東垣治痰厥頭痛惡心煩悶頭旋眼黑氣短促上喘無力懶言心神顛倒目不能開如在風雲中頭苦痛如裂身重如山四肢厥冷不得安卧如范天駭之妻因兩次下之而致頭

痛者用半夏白朮天麻湯

述古 共三條

活人書云頭痛者陽證也太陽證頭痛發熱惡寒無汗麻黃湯有汗桂枝湯若已發汗未發汗頭痛如破者連翹葱白湯不止者葛根葱白湯○陽明證頭痛不惡寒反惡熱胃實也調胃承氣湯○少陽頭痛小柴胡湯○太陰少陰並無頭痛之證○仲景只有厥陰一證吳茱萸湯

東垣曰金匱真言論云東風生於春病在肝俞在頸項故春氣者病在頭又諸陽會於頭面如足太陽膀胱之脉起於目內眥上額交巔上入絡腦還出別下項病衝頭痛又足少陽膽之脉起於目銳眥上抵頭角病則頭角額痛夫風從上受之風寒傷上邪從外入客於經絡令人振寒頭痛身重惡寒治在風池風府調其陰陽有餘則瀉不足則補汗之則愈此傷寒頭痛也○頭痛耳鳴九竅不利者腸胃之所生乃氣虛頭痛也○心煩頭痛者病在耳中過在手巨陽少陰乃濕熱頭痛也○如氣上不下頭痛巔疾者下虛上實也過在足少陰巨陽甚則入腎寒濕頭痛也○如頭半寒痛者先取手少陽陽明後取足少陽陽明此偏頭痛也○有真頭痛者甚則腦

盡痛手足寒至節死不治○有厥逆頭痛者所犯大寒內至
骨髓髓者以腦為主腦逆故令頭痛齒亦痛○凡頭痛每以
風藥治之者總其大體而言之也高巔之上惟風可到故味
之薄者陰中之陽乃自地升天者也然亦有三陰三陽之異
○故太陽頭痛惡風脈浮緊川芎薑活獨活麻黃之類為主
○陽明頭痛自汗發熱惡寒脈浮緩長實者升麻葛根白芷
為主○少陽經頭痛脈弦細往來寒熱柴胡為主○太陰頭
痛必有痰疾體重或腹痛為痰癖其脈沉緩蒼朮半夏南星
為主○少陰頭痛三陰三陽經不流行而足寒氣逆為寒厥

其脈沉細麻黃附子細辛為主○厥陰頭項痛或吐痰沫厥
冷其脈浮緩吳茱萸湯主之○血虛頭痛當歸川芎為主○
氣虛頭痛人參黃芪為主○氣血俱虛頭痛調中益氣湯少
加川芎蔓荊子細辛其效如神○半夏白朮天麻湯治痰厥
頭痛藥也○清空膏乃風濕熱頭痛藥也○薑活附子治厥
陰頭痛藥也○如濕氣在頭者以苦吐之不可執方而治○
先師嘗病頭痛發時兩頰青黃眩運目不欲閉懶言身體沉
重兀兀欲吐潔古曰此厥陰太陰合病名曰風痰以局方玉
壺丸治之更灸俠谿穴即愈是知方者體也法者用也徒執

體而不知用者弊體用不失可謂上工矣

立齋日久頭痛多主於痰痛甚者乃風毒上攻有血虛者有諸經氣滯者有氣虛者有四氣外傷者有勞役所傷者有可吐者有可下者當分虛實寒熱兼變而治之若夫偏正頭風久而不愈乃內挾痰涎風火鬱遏經絡氣血壅滯甚則日昏緊小二便秘澁宜砭出其血以開鬱解表余嘗治尚寶劉毅齋但怒則兩太陽作痛先用小柴胡加茯苓山梔子後用六味丸以生腎水而再不發○譚侍御每頭痛必吐清水不拘冬夏喫薑便止余作中氣虛寒用六君子當歸黃芪炮薑而瘥

○商儀部勞則頭痛余作陽虛不能上升以補中益氣湯加蔓荆子而痊

簡易方

硝石散 治風寒入腦頭痛不可當 因九七

一方 用生蘿蔔汁仰臥注兩鼻孔數年之患一注即愈

灸法

神庭

上星

後頂

百會

風池

以上諸穴隨灸一處可愈

頭痛論列方

麻黃湯 散一

桂枝湯 散九

葛根葱白湯 散三二

白虎湯 寒二

四物湯 補八

蓮鬚葱白湯 散三三

平胃散 和十七

和胃飲 新和五

補中益氣湯 補三二

二陳湯 和一

六安煎 新和二

十全大補湯 補二十

五福飲 新補六

玉女煎 新寒十二

小柴胡湯 散十九

六味地黃湯 補一二一

清膈煎 新寒九

理中湯 熱一

五君子煎 新熱六

滋陰八味煎 新寒十七

理陰煎 新熱三

六君子湯 補五

加減一陰煎 新補九

三陰煎 新補十一

吳茱萸湯 熱一三八

金水六君煎 新和一

左歸飲 新補二

羌活附子湯 熱三五

局方玉壺丸 和百五

調中益氣湯 補三二

調胃承氣湯 攻三

半夏白朮天麻湯 和十五

論外用備方

川芎散 散六二
頭風

川芎散 散六三
風熱

藿香正氣散

和二十
寒滯

十神湯

散四十
感冒

神木湯

散三七
傷寒

川芎茶調散

散四六
風邪上攻

清空膏

散七四
年久風熱

都梁丸

散七七
傷風

羌活附子湯

散五九
冬月犯寒

玉壺丸

和百五
風痰

上清散

散六九
吹鼻

羌活勝風湯

散六一
風熱

愈風餅子

散七五
頭風

菊花散

散七一
風熱

旋復花湯

散八三
風痰昏悶

如聖散

散七二
搖鼻

透頂散

散七十
搖鼻

八般頭風

散七六
搖鼻

點頭散

散七三
氣逆痛

芎芷散

散六七
風熱

芎辛導痰湯

散六八
痰厥痛

天香散

散六六
年久頭痛

神芎丸

攻七二
腫痛秘結

茶調散

寒七二
風熱上攻

石膏散

寒六九
易明風熱

雙玉散

寒七一
胃火

荆岑散

寒七十
頭風

芎朮湯

寒五十
濕痛

三生散

熱九六
痰厥痛

吹鼻六神散

因四二
風熱

硝石散

因九七
風熱吹鼻

當歸酒

補百五
血虛痛

黑錫丹

熱百九十
下元虛寒

面病

經義

邪氣臟腑病形篇帝曰首面與身形也屬骨連筋同血合於氣耳天寒則裂地凌冰其卒寒或手足懈怠然而其面不衣何也岐伯曰十二經脉三百六十五絡其血氣皆上於面而走空竅其精陽氣上走於目而為睛其別氣走於耳而為聽其宗氣上出於鼻而為臭其濁氣出於胃走唇口而為味其氣之津液皆上燠於面而皮又厚其肉堅故天氣甚寒不能勝之也○帝曰邪氣之中人也奈何岐伯曰邪之中人高也身半已上者邪中之也身半已下者濕中之也諸陽之會皆在

於面中人也方乘虛時及新用力若飲食汗出腠理開而中於邪中於面則下陽明中於項則下太陽中於頰則下少陽其中於膺背兩脇亦中其經○面熱者足陽明病

五閱五使篇岐伯曰五官者五臟之閱也脉出於氣口色見於明堂五官以辨闕庭必張乃立明堂明堂廣大蕃蔽見外方壁高基引垂居外五色乃治平博廣大壽中百歲○帝曰願聞五官岐伯曰鼻者肺之官也目者肝之官也口唇者脾之官也舌者心之官也耳者腎之官也○帝曰以官何候岐伯曰以候五臟故肺病者喘息鼻張肝病者皆青脾病者唇黃

心病者舌卷短顴赤腎病者顴與顏黑○帝曰其常色殆者何如岐伯曰五官不辨闕庭不張小其明堂蕃蔽不見又埤其墻墻下無基垂角去外如是者雖平常殆况加病哉

五色篇雷公問於黃帝曰五色獨決於明堂乎帝曰明者鼻也闕者眉間也庭者顏也蕃者頰側也蔽者耳門也其間欲方大去之十步皆見於外如是者壽必中百歲○雷公曰官五色奈何帝曰青黑爲痛黃赤爲熱白爲寒是謂五官○雷公曰以色言病之間甚奈何帝曰其色麗以明沉夭者爲甚其色上行者病益甚其色下行如雲徹散者病方已○雷公

曰病小愈而卒死者何以知之帝曰赤色出顴大如母指者病雖小愈必卒死黑色出於庭大如母指必不病而卒死○雷公曰死有期乎帝曰察色以言時庭者首面也闕者咽喉也闕中者肺也下極者心也直下者肝也肝左者膽也下者脾也方上者胃也中央者大腸也挾大腸者腎也當腎者臍也面王以上者小腸也面王以下者膀胱子處也顴者肩也顴後者臂也臂下者手也目內眥上者膺乳也挾繩而上者背也循牙車以下者股也中央者膝也膝以下脛也當脛以下者足也巨分者股裏也巨屈者膝臏也此五臟六腑肢節

之部也能別左右是謂大道男女異位故曰陰陽審察澤天
 謂之良工○沉濁為內浮澤為外黃赤為風青黑為痛白為
 寒黃而膏潤為膿赤甚者為血痛甚為攣寒甚為皮不仁○
 男子色在於面王為小腹痛下為卵痛其圍直為莖痛高為
 本下為首孤疝癢陰之屬也女子在於面王為膀胱子處之
 病散為痛搏為聚方員左右各如其色形其隨而下至胫為
 滯有潤如膏狀為暴食不潔左為左右為右其色有邪聚散
 而不端面色所指者也○其色上銳首空上向下銳下向在
 左右如法○以五色命臟青為肝赤為心白為肺黃為脾黑

為腎肝合筋心合脉肺合皮脾合肉腎合骨也

五臟生成篇曰凡相五色之奇脉面黃目青而黃目赤而黃目
 白面黃目黑者皆不死也面青目赤而赤目白面青目黑面
 黑目白面赤目青皆死也

脉要精微論曰夫精明五色者氣之華也詳後眼目門

刺熱篇曰肝熱病者左頰先赤心熱病者顏先赤脾熱病者鼻
 先赤肺熱病者右頰先赤腎赤病者頤先赤○太陽之脉色
 榮顴骨熱病也榮未交曰今且得汗待時而已與厥陰脉爭
 見者死期不過三日其熱病內連腎少陽之脉色也少陽之

脉色榮頰前熱病也。榮未交曰今且得汗待時而已。與少陰脉爭見者死期不過三日。○頰下逆頰爲大瘕。下牙車爲腹滿。頰後爲脇痛。頰上者鬲上也。

經脉篇曰：心主所生病者，面赤目黃，喜笑不休，煩心，心痛，掌中熱。

論證 共三條

形者氣之質色者神之華有諸中必形諸外故但知面中形色之常變則凡虛實寒熱凶吉死生之兆已可得其七八而再證以脉再察以因則病無遁情矣凡醫之所貴者在必能無

差欲能無差在確有真見使不有獨見之明則何以隔垣能觀而通神明之理經曰神乎神耳不聞目明心開而志先慧然獨見口弗能言俱視獨見昭然獨明若風吹雲故曰神又曰粗守形上守神故上古使儻貸季理色脉而通神明是可見形中之色無難辨也而色中之神不易言也學者於此必能以神會神斯云神矣又安能以筆楮盡哉

一而色之辨經言以詳諸所未盡猶當兼察也○凡病人面赤本皆屬火若滿面微紅而氣盛者此火證無疑也○若病人兩顴鮮赤如指如縷而餘地不赤者此陰虛也仲景曰面戴

陽者下虛故也。婦人尤多見之。○病人面紅不退者，邪盛病進，爲難愈。○病人面白，色者氣虛也。或曰兼淡黃而氣不足者，必失血也。○病人面白，有枯色者，血氣俱敗也。若證有痰火，則尤爲難治。○病人面青，或兼白者，必陽虛陰勝之病。○久病人面轉黃蒼，此欲愈也。○病人面黃潤而微赤者，必主濕熱。○病人面黃而兼青者，此木邪犯土，多不可治。○病人面色青蒼者，多主疼痛。○病難愈而面色如煤不開者，終不吉。○平人面色如灰塵，眼下青黑者，必有病至，其病必重。○女人面色青者，必肝強脾弱，多怒少食，或經脈不調。○女人顴頰鮮紅，名曰帶桃花，此陰中有虛火，多淫而無子。

一面腫有虛實，腫者爲實，浮者爲虛。實腫者，或熱或痛，乃因風火上炎，此以邪之有餘也。脈必緊數，證必寒熱，風則散之，火則清之，壅滯秘結，則通之，利之，邪去而腫自消也。○虛浮者，無痛無熱，而面目浮腫，此或以脾肺陽虛，輸化失常，或以肝腎陰虛，水邪泛溢，然浮而就上，其形虛軟者，多由乎氣腫而就下，按而或窩者，多由乎水。治氣者，須從脾肺，虛則補之，實則順之。治水者，須從脾腎，虛則化之，實則瀉之。然水氣雖分上下，而氣卽水之母，水卽氣之質，故有相因之化，而亦有相

因之治也○凡虛浮在氣者雖曰氣虛然亦有虛實之異不可執也蓋虛而浮者多因於脾此或以勞倦或以色慾或以瀉痢或以中寒而脈必微弱氣必虛餒者是也實而脹者多因於胃或木火熾盛而濕熱上浮或縱酒縱食而陽明壅滯此其脈必滿數證必多熱者是也然此證雖浮而不痛不腫自與前證有異虛實既辨則或補或瀉或痢或清所當詳酌而爲之治也

論治 共三條

凡風熱腫痛此必疔腮時毒癰瘍之證論治俱詳外科當察

治之或其甚者防風通聖散主之

一面目虛浮有因色慾過度陰虛氣越而致者宜六味地黃湯或八味地黃湯或加減八味丸○若因勞倦傷脾氣虛不斂而面目虛浮者宜參苓白朮散歸脾湯或十全大補湯○若因飲酒過度濕熱上聚而面目浮腫者宜葛花解酲湯或七味白朮散○若因瀉痢不止脾腎氣虛而面目浮腫者宜關胃煎或溫胃飲○若因食飲不節陽明壅實二便秘結而頭面滿脹者宜廓清飲惟小兒多有此證甚者宜木香檳榔丸下之○若陽明實熱胃火上浮或煩熱乾渴而頭面浮腫者

宜抽薪飲或白虎湯或大分清飲利之

一水腫面浮或眼下有如臥蚕者此水氣之為病也論治詳腫

脹門

一而鼻粉刺雀班諸方俱列因陣八七之後

面病論列方

六味湯補一

八味湯補一

加減八味丸補一

歸脾湯補三三

溫胃飲新熱五

葛花解醒湯和一二四

再關煎新熱九

白虎湯寒二

七味白朮散小七

廓清飲新和十三

大分清飲新寒五

參苓白朮散補五五

抽薪飲新寒三

十全大補湯補二十

防風通聖散攻十六

木香檳榔丸攻五十

論外備用方

玉容散因三百四

硫黃膏因三百五

面鼻諸方詳因陣六九

至一百止

口舌

金匱真言論曰中央黃色入通於脾開竅於口藏精於脾故病在舌本

陰陽應象大論曰中央生濕濕生土土生甘甘生脾脾主口在竅為口○南方生熱熱生火火生苦苦生心心主舌在竅為

舌

脉度篇曰脾氣通於口脾和則口能知五穀矣○心氣通於舌心和則舌能知五味矣

臟別論曰五味入口藏於胃以養五臟氣

奇病論帝曰有病口甘者病名為何何以得之岐伯曰此五氣

之溢也名曰脾癰詳三消門○帝曰有病口苦取陽陵泉病名為

何何以得之岐伯曰病名曰膽瘴夫肝者中之將也取決於膽咽為之使此人者數謀慮不決故膽虛氣上溢而口為之苦治之以膽募俞

四時氣篇曰膽液泄則口苦胃氣逆則嘔苦故曰嘔膽

邪氣臟腑病形篇曰膽病者善太息口苦嘔宿汁心下澹澹

人將捕之噎中吟吟然數唾在足少陽之本末亦視其脉之陷下者灸之其寒熱者取陽陵泉○十二經脉三百六十五

絡其血氣皆上於面而走空竅其濁氣出於胃走唇舌而爲味。

痿論曰肝氣熱則膽泄口苦筋膜乾筋膜乾則筋急而攣發爲筋痿。

熱論篇曰傷寒四日太陰受之太陰脉布胃中絡於噎故腹滿而噎乾。○傷寒五日少陰受之少陰脉貫腎絡於肺繫舌本故口燥舌乾而渴。

氣厥論曰膀胱移熱於小腸高腸不便上爲口糜。

五音五味篇曰衝脉任脉其浮而外者循腹右上行會於咽喉。

別而絡唇口。

五常政大論曰備化之紀其主口升明之紀其主舌。

五閱五使篇曰口唇者脾之官也舌者心之官也。

六節藏象論曰脾胃大腸小腸三焦膀胱者倉廩之本營之居也名曰器其華在唇四白其克在肌其味甘其色黃此至陰之類通於土氣。

五藏生成篇曰脾之合肉也其榮唇也。

奇病論曰足少陰之脉貫腎繫舌本。

經脉篇曰手陽明還出挾口交人中。○足陽明還出挾口環唇。

○足太陰連舌本散舌下○足少陰挾舌本○足太陰氣絕者則脉不榮肌肉唇舌者肌肉之本也脉不榮則肌肉軟肌肉軟則舌萎人中滿人中滿則唇反唇反者肉先死甲篤乙死木勝土也○足厥陰氣絕則筋絕厥陰者肝脉也肝者筋之合也筋者聚於陰器而脉絡於舌木也故脉帶榮則筋急筋急則引舌與卵故唇青舌卷卵縮則筋先死庚篤辛死金勝木也

診要經終論曰厥陰終者中熱隘乾善溺心煩甚則舌卷卵上縮而終矣

口問篇曰人之自嚙舌者何氣使然此厥逆走上脉氣輩也少陰氣至則嚙舌少陽氣至則嚙頰陽明氣至則嚙唇矣視主病者則補之

經筋篇曰足陽明之筋引缺盆及頰卒口僻急者目不合熱則筋縱目不開頰筋有寒則急引頰移口有熱則筋弛縱緩不勝收故僻

熱病篇曰熱病不可刺者有九六曰舌本爛熱不已者死

論證 共六條

口舌之病有瘡者有臭者有乾者有渴者有爲苦爲酸而諸味不

同者有重舌本舌而舌間出血及舌胎舌黑者在各方書多以口病為熱證然其中亦有似熱非熱及勞傷無火等證是不可盡歸於熱所當察也

一口舌生瘡固多由上焦之熱治宜清火然有酒色勞倦過度脈虛而中氣不足者又非寒涼可治故雖久用清涼終不見效此當察其所由或補心脾或滋腎水或以理中湯或以蜜附子之類反而治之方可全愈此寒熱之當辨也

一口苦口酸等證在原病式則皆指為熱謂肝熱則口酸心熱則口苦脾熱則口甘肺熱則口辛腎熱則口鹹或口淡者亦

胃熱也若據此說則凡以口之五味悉屬火證絕無虛寒之病矣豈不謬哉如口苦者未必悉由心火口淡者未必盡因胃熱蓋凡以思慮勞倦色慾過度者多有口苦舌燥飲食無味之證此其咎不在心脾則在肝腎心脾虛則肝膽邪溢而為苦肝腎虛則真陰不足而為燥即如口淡一證凡大勞大瀉大汗大病之後皆能令人口淡無味亦豈皆胃火使然耶故凡臨此者但察其別無火證火脈則不宜以勞傷作內熱而妄用寒涼此治有不容誤也

一口渴口乾大有不同而人多不能辨蓋渴因火燥有餘乾因

津液不足。火有餘者。當以實熱論。津液不足者。當以陰虛論。二者不分。反同冰炭矣。然渴雖云火。而亦有數種。當辨者。如實熱之渴。火有餘也。亡陰之渴。水不足也。故凡於大瀉之後。大汗之後。大勞之後。大病之後。新產失血之後。癰疽大潰之後。過食鹹味之後。皆能作渴。凡此數者。悉由亡陰。亡液。水虧。枯涸。而然。本非熱證。不得誤認爲火。總之。渴而喜冷。脈實。便秘者。固火證也。其有冷飲入腹。則滯沃不行。或口雖作渴。而但喜熱飲。及脈弱便澀者。皆非火證。矧復有口雖乾苦。而全然不欲茶湯者。此乾也。非渴也。尤屬陰虛之候。若作渴治。能無誤乎。故治此之法。凡火盛於上者。宜清肺。爲胃水。虧於下者。宜補脾。補腎。若陽虛而陰無以生氣。虛而精無以化者。使非水火並濟。則何益之有。首卷十問中有渴論。外科有作渴條。當並察其治法。

一。口鼻雖由胃火。而亦有非火之異。蓋胃火之臭。其氣濁穢。亦必兼口熱。口乾。及別有陽明火證者是也。若無火。脈火證。而臭如餿腐。或如酸胖。及胃口吞酸。飲食噯滯等證。亦猶陰濕。畱垢之臭。自與熱臭者不同。是必思慮不遂。及脾弱不能化食者。多有之。此則一爲陽證。宜清胃火。一爲陰證。宜調補心。

脾不得謂臭必皆熱以致生他病也

醫統口七情所鬱及心經熱壅則舌腫滿不得息○心熱則舌裂而瘡○肝熱則舌木而硬○脾熱則舌澁而胎○肺熱則舌強○熱甚則舌燥如鋸○舌卷囊縮者不治厥陰絕也

論治 共七條

一口瘡口苦凡三焦內熱等證宜甘露飲徙薪飲主之○火之甚者宜涼膈散玄參散主之○胃火盛者宜竹葉石膏湯三黃丸之類主之○若心火肝火之屬宜瀉心湯龍膽瀉肝湯之類主之○多酒濕熱口糜宜導赤散大分清飲五苓散之

類主之○若勞傷心脾兼火者宜二陰煎清心蓮子飲之類主之○若思慮謀爲不遂肝膽虛而口苦者宜七福飲理陰煎或五君子煎之類主之兼火者以黃芩龍膽草之類隨宜佐之○凡口瘡六脉虛弱或久用寒涼不效者必係無根虛火宜理陰煎理中湯之類反治之或用官桂噙嚙亦可

一外治口瘡敷藥陰陽散綠雲散細辛黃柏散白蚕黃柏散皆可用或臨臥時以川黃蘗啣口過宿亦妙○若口舌生瘡糜爛者宜冰玉散主之疳爛者冰白散

一口鼻由於胃火者宜清胃飲升麻黃蓮丸或竹葉石膏湯加

香薷主之。或千金口鼻方。皆可內清其火。此外如丁香丸。聖惠口齒方。福建香茶餅之類。亦可暫解其穢。

一舌胎舌黑。雖云火證。然實火虛火。皆能爲之。凡治此者。但當察脈證。以虛實爲主。而再以辨色之法參之。庶可無誤。蓋實熱之黑。必兼紅紫乾渴。或多芒刺。若沉黑少紅。而帶潤滑者。本非實熱證也。若其六脈細弱。而形困氣倦。則又最爲虛候。是必寒水乘心。火不歸原之病。此不救本。而但知治標。則萬無一生矣。○此之治法。凡裏熱未甚。而表散有未解者。宜柴胡諸飲之類。以解其表。○裏邪熱甚者。宜涼膈散。犀角地黃

湯之類。以清其內。此治實熱之法也。○若陰虛火盛。而兼有表邪未解者。宜補陰益氣煎之類。兼表裏而治之。○若形氣病氣俱不足。寒水乘心。而虛陽不斂者。必用理陰煎。理中湯。或大補元煎之類。以單救其裏。自可保其無虞。此治虛火之法也。○若舌有白胎。語言蹇澁者。以薄荷白蜜同薑片蘸而揩擦之。○外傷寒門。仍有辨舌正條。當與本門參閱。

一舌上無故出血者。謂之舌衄。此心火之溢也。宜金花煎。聖金散。黃蘗散。主之。或用千金口臭方。亦妙。

一重舌木舌。以舌下腫出如舌。故曰重舌。又謂之子舌。忽腫木

而硬者謂之木舌皆上焦熱壅故也惟宜砭鍼刺去其血爲上策及內服清胃降火之劑自愈○若舌忽硬起如猪胞或硬如木石不能出聲脹滿塞口則閉悶殺人但看舌下有如螻蛄或如臥蚕者急於腫突處砭去其血仍用釜底煤不拘多少以鹽醋調厚傅之或用井花水調傅亦可脫去更傅如不甚者單以此傅之亦愈

五傳治舌腫大塞口不通飲食經驗方用真蒲黃一味頻刷舌上其腫自退若能噉藥卽以黃蓮一味煎濃汁細細呷之以瀉心經之火則愈

醫統治一人舌腫滿口諸藥不效以梅花冰片爲末傅之卽消

鍼灸法

廉泉

治舌下腫口瘡舌縱舌根急縮

金津

玉液

上二穴可刺出血

天突

少商

口舌論列方

大補元煎

新補一

五君子煎

新熱六

犀角地黄湯

寒七九

大分清飲

新寒五

柴胡諸飲

新散五方

補陰益氣煎

新補十六

甘露飲

寒十

二陰煎

新補十

清心蓮子飲 寒三二

走薪飲 新寒四

七福飲 新補七

龍膽瀉肝湯 寒六二

理中湯 熱一

理陰煎 新熱三

竹葉石膏湯 寒六

五花散 和一八二

導赤散 寒一二二

升麻黃蓮湯 因百十七

玄參散 因百一

瀉心湯 寒二七

細辛黃柏散 因一二三

三黃丸 攻六八

清胃飲 寒五六

白蚕黃柏散 因一二四

冰玉散 新因四六

涼膈散 攻十九

千金口臭方 因一三三

冰白散 新因四七

黃蘗散 因百十五

金花煎 因百十二

聖惠口齒方 因一三四

聖金散 因百十一

陰陽散 因百二十

福建香茶餅 因三百二

綠雲散 因一二二

丁香丸 因百十八

論外備用方

加減八味丸 補一二三

直紫黃芩湯 寒百七

珊瑚丸 因百十

心肺熱

景岳全書卷二十六終



小册子...

...

...

...

...

...

Handwritten mark

Handwritten mark

四藏成徽明院州府海通和地崇崇馬甲 聖聖崇崇

聖聖崇崇

聖聖崇崇

聖聖崇崇

聖聖崇崇

聖聖崇崇

聖聖崇崇

聖聖崇崇

聖聖崇崇

聖聖崇崇